



Kruppá guoras gávdno ráfi

Oulu bismádálu šiljus lea juovlakruppá. Dan meattá ii sáhte vázzit bisánkeahttá, dasgo dat njulgestaga bisseha geahččat. Go adveantta áigge boadán bargosadjásan de čáppášan juohke beaivve duon muoras duddjojuvvon kruppá, mas olbmot ja eallit leat masá seamma stuorrá go luonddus. Lean fuomášan ahte dasa bisánit mángasat meattá váccedettiin. Muhtumin mánáidgárddi mánát bohtet dušše geahččat ja čáppášit kruppá.

Dán čavčča almmuhuvvo ođđa eahpevirggálaš Ođđa testameantta jorgalus OT2020 geavaha kruppás dajahusa “elliid suoinnit”. Ođđa testameantta greikkagielat álgoteavsttas fatnē (φάτινη) sáhttá dárkkuhit elliid biepmogárri dahje viiddit ráhkkanusa, saji dahje báikki, mas eallit bibmojuvvojit dahje gosa dat čohkkejuvvojit suodjái. Leš dal jorgalus dajahusain kruppá dahje elliid suoinnit, de juovlaevangeliumas mearkkašupmi lea čielggas. Gažaldat lea báikkis, masa Jesus, máilmmi Beasti biddjojuvvui dalán riegádeami maŋŋá.

Dáid juovllaid áigge geahčan Bismádálu šilju kruppá ja sávan, muhto seammás šuohkhan. Juos boahtte jahki livčče buoret. Vare korona viiduma sáhtašedje hávkadit ja beasašeimmet fas dollet ustiba gieđa. Áibbašit nu sakka nuppiideamet gaskavuodá, lagašvuodá ja guoskkaheami. Váibmosan boahtá adveantta rohkos: Hosianna! Oi veahket, beastte!

Gehččot sillomet čalmmiiguin dan kruppá, masa Jesusa, máilmmi Beasti riegádii. Iigo leatge imašlaš, ahte Ipmila Bárdni álggii eallimis dán máilmmis justa seamma láchkai go don ja mun; smávisin, álásin ja geahnoheapmin. Ipmil šattai olmmožin boaittobeale báikái. Son lei ollislaččat earáid árpmu veagas, nugo buot unnoraččat riegádettiin.

Jesusa riegádettiin dán máilbmái Ipmil bođii konkrehtalaččat lahka min, ja juogadii nie olbmo oasi ja dilálašvuodaid. Olmmožin riegádan Ipmila Bárdnái máilmmi ja dan olbmui gillámušat dáidige juovllaid eai leat apmasat. Son dovdá min eallima ja min oasi. Kruppá guoras minge dáhttot geahččat lagamuččaideamet. Kruppá guoras oaidnit buorebut nuppiideamet gaskavuhtii, ándagassii addimii ja soabahussii.

Buorre ustit, roahkasmahtán du dáid juovllaid jaskkodit kruppá gurrii ja ohcat doppe ráfi, man dán leabuhis máilbmi ii sáhte addit. Kruppá sisa riegádan Jesus lohpidii rávesolmmožin šattadettiin máhtajeddjiide ná: “Ráfi mun guođán didjiide. Iežan ráfi mun attán didjiide, in fal dakkára maid máilbmi addá. Allos din váibmu suorganehko, alletge dorvvuhuva.” (Joh.14:27)

Sivdniduvvon juovllat Dutnje ja du lagamuččaide!

Oulus ovdal adveantta 2020

Jukka Keskitalo
Oulu bismágotti bismá